

憶雲詞
附詩詞補遺





詞 雲 憶

遺補詞詩附

撰 紀 廷 項

王雲五主編

叢書集成初編

憶雲詞

附詩詞補遺

中華民國二十六年十二月初版

撰者 項廷紀

發行人 王雲五
長沙南正街

印刷所 商務印書館
長沙南正街

發行所 商務印書館
各埠

周

（本書校對者 陳忠光 龍旭光）

憶雲詞序

蓋聞雍門揮弦。孟嘗君爲之掩泣。桓伊撫箏。謝太傅因而殞泪。有觸斯發。殆有不能自己者乎。予自悼傷以來。每讀昔人哀怨之詞。則萬感之交集也。今秋杭州許邁孫先生重梓其鄉人憶雲生所爲詞四卷。而命予序之。予觀其字必色飛。語必魂絕。雖皆緣情綺靡之作。感遇怨悱之旨。而使人鏘鏘洋洋。悽然以思。黯然以悲。凡吾身之所直。目之所接。纏綿悱惻。煩冤鬱積。低徊而不能自言者。皆若於是編具焉。楚之騷耶。庾之賦耶。抑漆室之嘯。而韓娥之歌耶。雖然。予聞之邁孫。憶雲生家世王謝。富埒陶衛。則夫吳簫乞食之辱。皋廡賃舂之勞。固知免矣。然而奇律莫采。逸步終蹶。茵溷飄泊。關河棲屑。洗馬度江之歎。琅邪登山之慟。故以叩追往古。俯感來禩。况乎非介推之隱。而

竟罹焚山之災。異湘纍之放。而幾有懷沙之厄。積恨銷骨。古愁塞胷。越吟自哀。湘血彌豔。其志其遇。蓋可悲也。嗟乎。不爲無益之事。何以遣有涯之生。中自序此其詞之所由傳歟。且夫瓠梁託弦以流音。思同調也。中山聞樂而屑涕。感曼聲也。僕本恨人。矧當瑟尻。水僊不來。孤唱誰穌。山鬼獨笑。對景忽絕。目送浮雲。心傷逝川。寄愁何處。薶憂無地。撫斯卷也。詎能不懷東山而斷腸。望西麓而獻弔者哉。若夫以代興之才。而爲起廢之舉。篤曠世之誼。而抱絕軫之痛。補白石之小傳。訂碧山之遺音。如吾邁孫者。尤近代所罕覯矣。憶雲生安在乎。吾將具杯酒以告之。光緒癸巳秋九月金匱鄧瀛

項君小傳

清 仁和譚 獻撰

項君鴻祚。字蓮生。錢唐人。道光十二年舉於鄉。家世業鹽筴。至君漸落。性湛然耆古。嘗避喧南山。讀書僧院。就泉看山。無復塵念。姊婿許文恪公視學江西。君偶從之。一日游百華洲。意有所感。輕舟徑歸。不以告也。君文辭爾雅。詩不多作。善填詞。幽異窈眇。浸淫五代兩宋。而擷精弃滓。好儼溫韋以下。小樂府津逮艸窗、夢窗。蹊徑旣化。自名其家。談者比之江淹雜體詩云。手訂詞藁。矜慎多芟削。最後存憶雲詞甲乙丙丁藁四卷行於世。先是家被火。室燬。奉母應文恪之招於京邸。途次遇水。母與從子皆道殤。君蒼黃歸。幽憂疾病不自振。旣再上春官。被放。輒軻久。遂卒。時道光十五年也。君詞藁自序。一則曰。不無累德之言。抑亦傷心之極致。再則曰。不爲無益之事。何以遣有涯之

生。嗚呼悲矣。君原名繼章。改名廷紀。卒年三十八歲。

憶雲詞甲稿自序

憶雲生自束髮學填詞。少作。存若干首。夫詞者。意內而言外也。意生言。言成聲。聲分調。亦猶春庚秋蟹。氣至則鳴。不自知其然也。生幼有愁癖。故其情豔而苦。其感於物也鬱而深。連峰巉巖。中夜猿嘯。復如清湘戛瑟。魚沈雁起。孤月微明。其窅窅幽淒。則山鬼晨吟。瓊妃暮泣。風鬟雨鬢。相對支離。不無累德之言。抑亦傷心之極致矣。一二知者。彊拊我於名勝之後。雖復悄然自疑。而學之愈篤。今乃削墨胥山之雲。滌筆娥江之水。次爲新編。以吟以歎。謂之甲稿焉。癸未小除夕雨中書

憶雲詞甲槩

清 錢唐項廷紀蓮生撰

清 仁和許 增邁孫校

點絳脣

秋意

夢怯秋清。小屏題徧相思句。露濃如雨。不響梧桐樹。采藥闌空。是舊吹笙處。愁凝佇。暗蛩無語。涼月隨人去。

浪淘沙

元夜有懷

綠酒負金蕉。疊鼓春宵。小屏風底暗香焦。閒夢一牀推不去。夜夜楓橋。往事只魂銷。雙鯉迢迢。梅華與我兩無聊。牘有眉樓弓樣月。還

憶吹簫。

減字木蘭華

湖上春游

清明過了。小雨綠勻隄外艸。倚櫂湖邊。絮影華香共一船。相思人面。曾向弟三橋畔見。斜日歸休。樓上春寒燕子愁。

東風第一枝

春陰

更不成晴。何曾是暝。飛絲搖漾殘晝。麴塵低蘸。亭蕪茶煙細。籠院柳。釀華天氣。早釀得春醲如酒。莫妨他。油碧芳期。容易雨疏風驟。縈絮粉模鈿。鴛鴦。鋪棟雪迷離翠岫。癡雲著意商量。湘波幾重皺皺。禁寒作煥。想未管綠鶯嗁瘦。怎知人。盡日慙慙。悶過海棠開後。

聲聲慢

春聲擬竹山

賣錫小巷。撾鼓深閨。合成一片春聲。暗逗芳心。長隄隱隱車聲。二十
四番風訊滿。西湖吹散歌聲。游倦也。正畫樓夜雨。滴碎檐聲。又是
紗窗曉霽。問驚回香夢。誰簸錢聲。燕語鶯囀。中間卻帶鶉聲。莫更訴
愁不住。怕落華飛盡無聲。華自落。減秋千牆裏笑聲。

百字令

春雨閉門。悵然成詠。

今年春事。又怱怱過了。畫簾吹絮。晝掩蘼蕪深院靜。愁鎖一庭香雨。
蔭碧池塘。鬧紅臺榭。都是鳩啼處。遠山凝翠。有人還憶眉嫵。回想
趁月移船。臨風擲簫。多少閒情緒。卻是旗亭華落後。盡亂酒邊殘譜。
巷陌錫簫。寺門茶鼓。總負尋芳侶。斷腸無那。錦屏題遍新句。

東坡引

闌干愁倚徧。幽懷怎消遣。看華悄步閒庭院。海棠開一半。海棠開一半。綠窗自掩。珠簾還卷。羅帳揭。香衾展。繡奩未整熏鑪燠。如何人不見。如何人不見。

河傳

秋雨

秋雨千縷灑方塘。敬枕西堂夜長。梧桐葉兒風打窗。新涼薄衾閒半牀。愁裏畫屏天樣遠。銀燭短。夢也無人管。怕相思。越相思。除非影兒權作伊。

南歌子

卓女鑪邊酒。崔孃畫裏人。一餉楚臺春。端詳依舊是瘦腰身。

綺羅香

感舊

簾影移香。池痕浸綠。重到藏春朱戶。小立牆陰。猶認舊題詩句。記西園撲蝶歸來。又南浦片颿初去。料如今塵滿窗紗。佳期回首碧雲暮。華年渾似流水。還怕嗁鶂催老。亂鶯無主。一樣東風。吹送兩邊愁緒。正畫闌紅藥飄殘。是前度玉人凭處。賸空庭煙艸淒迷。黃昏吹暗雨。

臨江仙

有限春宵無限夢。夢回依舊難留。淚珠長倚枕函流。書來三月尾。鐙盡五更頭。見說而今容易病。日高還掩妝樓。桃華臉薄不禁羞。瘦應如我瘦。愁莫向人愁。

東風第一枝

擬小山

鬪艸庭閒。簸錢院靜。東風吹滿香絮。薄寒尙勒華期。天意似催春暮。

杏梁歸燕。幾曾會相思言語。便等閒飛入盧家。不帶離魂同去。空
自想俊游伴侶。又煩惱酒邊心緒。鸞牋待寫深情。腸斷都無新句。初
三下九。問舊約更誰憑據。怕有人蹙損雙蛾。日日畫樓聽雨。

瑞鶴仙

擬夢窗

漏瓊侵鈿琯。正依依夢別。小坊幽院。熏衣練香輦。掩金蟬組帳。密鐙
慵翦。翠尊自煖。未相思柔腸寸斷。恨燕翎不寄雲牋。十二碧城天遠。
蔥蒨螺心。睡髻鳳眼。橫釵賦情難遣。烏絲淚滿。詩寫在舊團扇。算
唳鴉枝上。烘愁澹月。曾識秋孌半面。看今宵兩處凭闌。是誰病慣。

戀繡衾

擬艸窗

漏殘酒醒鐙半昏。被池寒檀篆自熏。想月轉牆西角。悄無人愁過夜

分。揉藍靶子餘香在。怕如今添了淚痕。夢不到梨華院。任東風吹作碎雲。

風入松

擬蛺蝶

垂楊絲雨小窗前。溼粉墮香絲。東君不是繁華主。怕蔥蔥信了唬鶻。要趁棟華風起。送他桃葉舟還。每逢三月病懨懨。詩負衍波牋。連宵嬾索金蕉飲。有篝鐙知我無眠。忽憶去年今夜。春寒弟幾樓邊。

南浦

詠柳

春水漲谿。渾是濛濛昨夜。楊華吹徧。走馬問章臺。長隄外和雨和煙一片。纖腰自舞。料應未識相思怨。可惜笑桃人別後。孤負年年青眼。怪他眠起無端。好光陰都付小鶯雛燕。不向陌頭看。爭知我盡日。

魂銷腸斷。絲絲縷縷。幾時繫得東風轉。且去西泠橋畔等。萬一樣船重見。

水龍吟

詠敗荷

瑤池昨夜。新涼一匳。環珮秋聲碎。多應卷盡晴絲萬縷。靜香十里。驚悵盟寒。鴛鴦夢冷。畫闌誰倚。賸吳娃小艇。采芳重到。料比似人蕉萃。可是淩波僊子。嫁西風。艷妝都洗。碧筩喚酒。紅衣試舞。舊懽難記。怕點清霜。怕逢疏雨。怕隨流水。算關心。只有跳珠。蕩亂作相思淚。

天香

末麗

紈扇涼輕。紗幮月靜。嫩陰淺隔庭樹。豔雪玲瓏。小蓮恩舊。清絕自然無暑。蘭姨蕙姊。可相識。蕊珠僊侶。最稱晚妝浴後。熏風暗飄窗戶。